

TROUBAS KATER



IZ
EIFACH
NID
ABE
LUEGE



TROUMZÄUT

du weisch di zit geit ume
di meischi zit geit ume
süscht git si nüt
ig mues kämpfe das i zit berchume
mini zit geit ume

zitgfüeu hani ewig scho verlore
d uhr die ticket ständig monoton
hämmerset e countdown mir id ohre
im ne irgendwie verurteilende ton

teu luege z läbe aus es gschänk a
und si schaffe und würke wi no nie
si säge du weisch nie wenn aus wird z änd ga
dini tröim muesch verwürkleche hüt und hie

*doch i wüsst nid wieso
bi so weni hie
i bi eigentlech au tag
däne i der troumwäut*

*und hätt nüt dervo
bi so weni hie
finde eifach aus viu
schöner i mim troumwäut*

*Lebe jeden Tag,
als wäre es dein Leben.*

HAUBLÄÄRI

i sta vorem bärg i mir bedüigslosigkeit und lose
anduurend di gschichte wo näär z glück i d hose geit
ersuufe fasch i biuder und i au denä verzierigä
vo haublääre verspräche a mi säuber

schützehiuf vor eigernordwand das isch nur es lied
aber i tat u wahrheit weisi würklech vou nid wasi wott

i luege über z ämmitau ir fernal glogge chüe
es schmöckt nach tannehouz im für
e mueter rüeft de ching zum ässe
im ne singsang wo nur e mueter cha aber si rüeft nid für mi
mir hei ou nüt angers wöue mini einsamkeit und ig

*ooh wi ni mis läbe lang di freiheit zelebriert
und plötzlech schiint mer die so nutzlos
und vor auem schiint sie läär*

*s isch nur e uswiichsmüglechkeit
sie stüüret ständig hin und här
sie intressiert sech nid für mi
es intressiert se würklech niemer*

*mis haube läbe lang die freiheit vergötteret und prise
aber zrugg cho isch nüt vo ihre*

VERSPRÄCHE



uf der wiese stö paar schaaf u luege wullig über d täler
plötzlech dünkts mi dass no die freier gebore si aus ig
trotz em zuun – gits ke ufgab gits ke sinn
gits ke iisatz gits ke gwinn
gits e zuefau gits e drüsatz wo nid stimmt

mmmh i bi so vor dir uf d chnöi
mir isch der bode nümme tröi
verlouft u chnättet sech i ton
hie mis wäutbiud zur auktion

*freiheit isch nur es angers wort für nüt me ha z verlüüre
oder nüt meh angers z tüe ha – das han i nie richtig verstange
und ke bock gha das ga z google irgendwie spiuts ou ke roue
mit de sicherheite stirbt si und mit ihre stirbt vertroue*

*mis haube läbe lang die freiheit vergötteret und prise
aber zrugg cho isch nüt vo ihre*

FLÜGENDI INSLE

i wache uf warmbettet ire aukohoufahne
fühle mi irgendwie vo mim aubtroum no plaget

mini wohnig isch vo gspängster besässe
es isch chaut ha gester aabe äue d fänster vergässe

mi mitbewohner isst ravioli bätzi mit miuch
lise zitig i bi uf der titusite mit biud

schiinbar füeri wider z ranking im betribigsregister
aber sit dir isch das nümme so wichtig

*ha nur no hundert sorge mit dir
sogar der himu het hüt sones grinse
i füeu mi unzerstörbar bi dir
mit dir isch d wäut ei flügendi insle*


mini chatz het sech im toster verschloff
i bi nass mis dach isch düregrostet es loch

schliiche ar nachbarin verbi di isch vo dämone besässe
das weisi sit si mau vor mir brutau melone het gässe

i de strasse im quartier hange bruuni plakat
bösi jungs mit bluethüng hei ihri chneble parat

mis telefon seit d mueter wott mi vorenterbe
i nenn mis telefon iz sorgebarometer

*ha nur no hundert sorge mit dir
sogar der himu het hüt sones grinse
i füeu mi unzerstörbar bi dir
mit dir isch d wäut ei flügendi insle*



was d wäut bruucht:
lüt wo üs neui ufer ufzeige
was d wäut nid bruucht:
en überdosis usruefezeiche

was d wäut bruucht:
es monumänt für d rettigs-sanität
was d wäut nid bruucht:
influencer blogs über many-money-cash

keni terminserie iladige
u computerproblem
wo mir närl zeige eigentlech
bin ig der fähler im system

die wäut bruucht keni
giga-riesekonzärne
di wäut bruucht mönsche wi di
wo üse tanker chöi wände

*und i ha chum no sorge mit dir
du chasch hie aus viu farbiger pinsle
gäbs nume hundert mönsche wi di
de wär die wäut ei flügendi insle*

*ha nur no hundert sorge mit dir
sogar der himu het hüt sones grinse
i flüeu mi unzerstörbar bi dir
mit dir isch d wäut ei flügendi insle*

i bi i lade gange und ha gfragt: wo chunt das här?
si hei gseit si wüssis nid i ha gfragt so ungefähr
si hei gseit: los di chettine si sehr kompliziert aber
äue wird dä shit aus in china produziert

i bi i möbulade gange u ha gfragt wie heiters bout
si hei gseit si wüssis nid si heiges säuber nöime ghout
i ha gfragt mi häts wunger gno wie das funktioniert
si hei gseit äue wird dä shit in china produziert

so bini umegloff
und ha gsuecht
läck bini umegloff
luege ganz beschuudigt uf mi schue und uf mini socke


wie cha das sii das isch so verdammt wit wäg
kameurügge bringe side vase u mi schissdräck

*da isch irgendwie e worm ir made in china
bi gar nie ine lade in china
si irgendwenn am ne drache i schlund cho
uuu aues chunt vo: zhong guo*

i bi zu mire mueter gange und ha gfragt wo chumi här?
si het gfragt wini das meine i ha gseit i tue mi schwär
si het gseit das mit de biendl hani dir doch scho erklärt
i ha gseit das vo mim ursprung isch somit no nid klärt
si het gseit los mir si jung gsi am reise und verliebt
und äue hei mir di denn in china produziert

so bini umegloff irgendifwie verlore und verwirrt
überau hets nur no sache wo sech d spur drin verliert
auso häbi mi iz wenigstens hie no bi däm lied wüu da weisi:
das isch sicher nid in china produziert

*da isch irgendwie e worm ir made in china
bi gar nie ine lade in china
si irgendwenn am ne drache i schlund cho
uuu aues chunt vo: zhong guo*



ersch wenn di betschi
di betschi saite grupft,
z bertschi wort gsunge,
der bertschi ton verhauet isch,
wärdet der merkä,
dass me hivkonzärt
nid cha ufen handy lose.

MADE IN CHINA



SORGE & SCHNAPS

spät nach der prob gömer i di bar dörte – stange
musig viu z lut hane nid düblech – verstange
hoselade off hemmli verchert – anne
aber schiinbar stört das hie nüm – nume manne

manne mit sorge erkennt me am schnaps – wo si stinke
me versteit sech aber redt chuum e satz – instinkte
chummererfüut luegt er mi a seit: hie trinke
nur der tüüfu alei würd iz nid...

eis paar stung speter wird d fläsche umkehrter
e frömde wird fründ wird zum brueder luegt zue der
und so wird vergässe vo geischter besässe
dämone ustriebe doch d froue – di blibe

*aya mini rose isch furt
laht mi eifach hie alei
warum oh warum bom bom bom
hundert mau hani verseit*

*oh mini rose isch gflohe
isch uf und dervo und verreist
wohär hani chönne wüsse dass sie
nume hundert und einisch verzeiht*

hundert isch keinisch

*mi kampf zwische
chopf und härz
Schlatmer uf d läbere.*



dussligi manne mit bierigem ranze wo
tango mit bousteu markierige tanze
und eine weis gar nid warum ischer blau
für e anger isch das es reinigungsrituau

manne mit sorge erkennt me am schnaps – wo si stinke
me versteit sech aber redt chuum e satz – instinkte
chummererfüüt luegt er mi a seit: hie trinke
nur der tüüfu alei würd iz nid...


*ay irgendwenn chunts
oh irgendwenn chunts schänket ihm i
nach eire fläsche rum bom bom bom
fauts ihm närne i*

*oh i vermiss ihre atem vermiss ihres lache
vermiss ihre duft i vermiss ihri sache
ihre haus ihri brüscht sogar z schmatze
iz weisi ha se gliebt oh was söui iz mache*

*aya mini rose isch furt
laht mi eifach hie alei
warum oh warum bom bom bom
hundert mau hani verseit
aya sini rose isch furt
laht ihn eifach hie alei
warum oh warum bom bom bom
hundert mau heter verseit*

*oh sini rose isch gflohe
isch uf und dervo und verreist
wohär hätt är chönne wüsse dass sie
nume hundert und einisch verzeiht*

*i sunfe, bis d wäut
wider e schibe isch.*





DINI SCHWÖSCHTER

hesch schnäu e minute? i mues dr öppis biichte
du kennsch doch dini chopfhörer da di wisse?
ig ha se kaputt gmacht das tuet mer leid
i tubu bi druf gstange wo si a bode si gheit

i ha se vo dire schwöschter gno ha gar nid gfragt
i ha grad bruucht sie het se bi mir i der wohnig gla
sie het drum bi mir gwohnt di letschte vier mönet
sie het e ort bruucht für sich vo de droge z entwöhne

*mir hei üs lehre kenne das scho lang mau wöue säge
bim güeterbahnhof uf der stäge isch sie gläge
ke ton vo sech gä völlig wäg u vou verchlepft
sie isch bi mir izoge mir hei stundelang gredt*

*paar wuche speter isch de d farb wider cho
u mir hei games gmacht mit zäme schlafe und so
u närl isch liebi cho und eis führt zum angere
üs so guet verstange*

los mir isch wichtig dass du weisch
dass i immer zue der sta o wenn du mau uf öppis steisch
es isch nid ok dass ig dis eigeatum zerstöre
dini schwöschter het no gseit dass si äbe dir ghöre



sie isch bi mir im bad gsi plötzlech ghör se schreie
us schock het sie der schwangerschaftstester la gheie
und du kennsch doch die momänte wome nid so gnau weis
und genau denn si mir d chopfhörer abegheit

*mir hei üs lehre kenne ds scho lang mau wöue säge
bim güeterbahnhof uf der stäge isch sie gläge
ke ton vo sech gä völlig wäg u vou verchlepft
sie isch bi mir izoge mir hei stundelang gredt*

*paar wuche speter isch de d farb wider cho
u mir hei games gmacht mit zäme schlafe und so
u när isch liebi cho und eis führt zum angere
üs so guet verstange*

*mängisch entgleise eim sache im läbe
bim güeterbahnhof uf der stäge isch sie gläge
ke ton vo sech gä völlig wäg u vou verchlepft
sie isch bi mir izoge so diräkt näb mir imbett*

*i ihrem gsicht isch de d farb wider cho
u mir hei games gmacht mit zäme schlafe und so
u när isch liebi cho und eis führt zum angere
iz isch sie schwanger*

RELEGIONE

i bi uf der suechi nachme sumpf mit me rägeboge
nach me grüene tau mit me wasserfau
derbi hani e stäcke mit me sack drum
u schliche am aabe dürd gebüscht ume wachturm


di jungi häx het gseit mis päch sigi nid der fau
ig und sie imbett schutzritua
sie het schwarzi chrusle und e spitznase
u mir si beidi tief bis a spitztache

i ha immer ghofft i chönn der stoub vo dere wäut puschte
weni nume gnue höch obe abe hueschte
i ha gmeint i chönn d sunne chli uf d egge richte
und au hei immer gseit i heigs no nid begriffe

i bi über stock u stei und über heifisch zähn
ei tafle schoggi und paar blödi plän
ei schweissstropfe uf ne heisse stei
u närl zfride glost winer heiser schreit

*und am ne legendäre tag i der schicksausäbni
bi ig freie geist mim feind begägnet
idee wo sech zu armee forme
ig alei gäge relegione*

eis wäut biud a nes grab male
e statue für ne tote heud ine chäuer steue
es neus wappe zeichne und dr stoff risse
und am mast überem hof e neui flagge hisse



ig boue mir es höchs floss us eune öufesser
aus wo hie am standard i wäg chunt das stört besser
jede wo der ton füeut dä ghört besser
jede wo e muur bout het zerstört besser

i bi wit gloffe bis iz hinduland
eifach aus grad us ab hindubank
i ha blatre a de füess gha und air max druf gschrive
bi geng vom wäg abcho aber immer druf blibe

*und am ne legendäre tag i der schicksausäbni
bi ig freie geist mim feind begägnet
idee wo sech zu armee forme
ig alei gäge relegione*

plötzlech aber hani vo wit här ghöre d glogge lüte
und i ha sofort gwüsst das het nüt guets z bedüte
so ha o i müesse verlüüre lehre
und mi hass uf au di table wo mer züüg erkläre

mir au geng nume gseit was mir nid guet mache
aber niemer het e plan was mer guet mache
viu wird gheiligt dür beteiligung
i däm riese schiinheiligtum



ENZYM

weni ehrlech bi ha ig nur früsches bluet gsuecht
und ha di haus gfunge
doch bevor i zähn gwetzt ha
bisch du mi agsprunge

was i gsuecht ha isch e bluetqueue so
dass i mi durscht stiue cha
doch du hesch dis härz häre gha
und i ha hunger übercho

weni wider zrügg mues dänke a das fragi mi bini eigentlech schuudig
bini wi besässe gsi vo däm rot aber du hesch mi erlöst du bisch guudig
näbe dir bruuchi di nacht äbe nid wüu di glanz überbländet
di schatte i mir
i frage mi wele griechisch gott äch chönti di vatter si

*hey aues gsehni neu
farbe um mi zeichne mini chance wider neu
diffusi zeiche drum
dass scho d sunne ufe geit
vorhär hani die nid ertreit
doch du hesch irgend es enzym
irgend es enzym
du hesch mi id sunne usetreit*

und du hesch aus gha
vom guete luun u dis bombardement es isch aus da
elektrifizierende blick und ig nüm hautbar
ändlech es neus gsicht i dere verdammte autstadt
die hets so nötig gha
i ha di nötig gha


immer wieder drückt das glück uf mi nieder denn wenis nid würd erwarte
i bi so verzückt vo dir u dim fride liege i der sunne im garte
sit du mi hesch troffe mit houz hangt der schwarz umhang ame haage
sit i di ha gseh legi mi nüm alei ine sarg zum ga schlafe

*hey aues gsehni neu
farbe um mi zeichne mini chance wider neu
diffusi zeiche drum
dass scho d sunne ufe geit
vorhär hani die nid ertreit
doch du hesch irgend es enzym
irgend es enzym
du hesch mi id sunne usetreit*

du hesch mi troffe i der nacht – houzpflock
härz offe glacht – es enzym
härz offe gmacht – es enzym
härz opfer bracht

du bisch dä chnopf wome eifach druf steit – tango
scheiss egau was id luft geit – tango
scheiss egau was dört druf steit – tango
scheiss egau was id luft

*hey aues gsehni neu
farbe um mi zeichne mini chance wider neu
diffusi zeiche drum
dass scho d sunne ufe geit
vorhär hani die nid ertreit
doch du hesch irgend es enzym
irgend es enzym
du hesch mi id sunne usetreit*



HÄRZ:BLUET:LOUF




mis bluet louft träg über dicki steine
über fänsterläde über chauti muure
d stäge derab am boge entlang
tropft über d böde vom gwöubechäuer
sickeret langsam im gwöubechäuer
trifft irgendwenn uf ne herti platte
verschwindet ir ewige tiefi unger
schiinbar ändlos tief dört unger

aber mis bluet es pumpet no
härz gumpet nüm aber pumpet no
nümme fliesse kei option
härzbluet es pumpet no

theoretisch chani mir aus leischte hie
wi di meischte hie
chöschte si nüt aus entscheidige
u mängisch chöi mir üs ächt nid einige
über züüg wo mis läbe chuum tangiert
während eigentlech immer grad viu passiert
ig verschwände mini zit
du verschwändisch dini zit
rot oder blau – ar wäut egau
rot oder blau – ar wäut egau
rot oder blau – ar wäut egau
rot oder blau

z tageslicht bländet mi zersch unändlech
z chüele bluet schiesst use i hang
i däm wiesegebiet
hinger mir mi riese palascht
gnau gwüssst wis wär chönti flüge
mi cha befreie vo däm riese ballascht
emporstige treit vome warme wind
imne morgeliecht wo wieder farbe bringt



u der bluetlouf wo sechdür di
landschaft schlänglet (geng e wäg)
sech verbiegt wes äng wird
(geng e wäg)
hin u här schlingt (geng e wäg)
aber geng e wäg fingt

hin oder här (git geng e wäg)
hin oder här (git geng e wäg)

hüguzüg bedüte di nächschi gränze
u dört wächslet z wätter

*du weisch dis bluet es pumpet no
härz gumpt nid aber pumpet no
dunkli wuuche über tuupe
härzbluet es pumpet*

*akündet vo gänsegeier
blueträge dicht über d ländereie
dunkli wuuche – farbe (grau)
tropfe überschattet (aus)*

*aues woni liebe
liebe chani aus
wuuchebänder zieh sech
dür das hundertwasser-tau*

*aues woni liebe
liebe chani aus
hunderttuusig tropfe*

ir luft e fuchsschwanz
wo so ungliichmäig dür d luft tanzt
geng usgwiche vor irgendere bousteu
luegi zrügg hets irgendwo e bousteu
aus isch geng so temporär gsi
loosla isch geng henne schwär gsi
u di freiheit i däm freie fau
so unkontrolliert darum schreie au

d zit treit üs zum nid gwäute fride
schüüche dä ort wi nüt süsch
wähl li mi eige t grabstei?
oder wähle dä äbe mini angere?

mis bluet louft träg über dicki steine
über fänsterläde über chauti muure
d stäge derab am boge entlang
tropft dürd böde uf herte granit

ingt si wäg iz morge graue
plätscheret fröhlech vordürz tau ab
flügt i dunscht aber rägnet wider
früschen
iz läbe mer wieder!

*du weisch dis bluet es pumpet no
härz gumpt nid aber pumpet no
dunkli wuuche über tuupe
härzbluet es pumpet (no)*

*wenn o 30 jahr mi nid locker bringe
mis bluet wott angeri tropfe finge
härz het fasch chline ppropfe (drin)
u weni di gseh stockets (ging)*



*aues woni liebe
liebe chani aus
wuuchebänder zieh sech
dür das hundertwasser-tau*

*aues woni liebe
liebe chani aus
hunderttuusig tropfe
am pulsiere i däm tau*


*du weisch dis bluet es pumpet no
härz gumpt nid aber pumpet no
dunkli wuuche über tuupe
härzbluet es pumpet (no)*

*akündet vo gänsegeier
blueträge dicht über d ländereie
dunkli wuuche - farbe (grau)
tropfe überschattie (aus)*

*aues woni liebe
liebe chani aus
früschi tropfe schiesse
i das hundertwasser-tau*

*aues woni liebe
liebe chani aus
u mi bluetlouf am pulsiere*

..STÄGELI UF STÄGELI AB



är us em dorf
sie us der stadt
är het e hof
sie het ke vatter

är geit nid us
sie geit nid i
si wüsse beidi nid wär si wei si

voumond steit höch
heu-wissi nacht
finge ke schlaf
beidi si wach

är luegt iz land
sie anes dach
är fragt sech geng wieder
waser süo mache

sie het gedanke wo nüm höre kreisse
es macht se chrank
dass sie nid cha entscheide

so loufe di beide
ir wohnig desume
geng hin u här
zeiger geit ume

beidi si uf
beidi si wach
stägeli uf
stägeli ab

läbe geit wie?
äbe nid ab
beidne blibt z läbe grad chläbe di nacht

u während di beide närvös i der wohnig
so langsam ke luft me berchöme
hüület en üule ir ferni wo macht dass sie
beidi gad luscht überchöme

use id nacht
irgendwo häre
irgendwo wo me sech nid mues erkläre

dört wotti si
use iz freie
isch ihre drang u dä risst gad a beidne

risst a der luscht
u die risst am härz
das schlaht der takt
schneueri schläg

beidi stö uf
zitgliichi schritte
wüsse ja beid nid was si da het gritte


aber är gspürt
aber sie gspürt
dass ihre fade hüt nacht usefüert

aber är füeut
aber sie füeut
dass da gad öppis im gröbere wüeut

är hout si huet
sie ihre schau
är bingt sech d schue
sie bingt sech d haar

är nimmt der chittu
sie schlüpft i mantu
und beidi chnöpfe bis obe a haus zue





der wäg isch z zu.
nur wär z zu kennt,
findet o der wäg.
u der wäg isch z zu,
aber z zu isch der wäg.
wo söni iz häre zile?
z zu isch im wäg.

lueg nid i spiegu
dänkt sie für was?
är isch scho duss
uf richtig waud

use im freie
früschi ir luft
voumond steit hööch
lüüchtet i huuch

sie louft dür d stadt
gasse si ruhig
wiederhaue das «glagg»
vo ihrne schue

är louft im waud
fischtere striich
unger sim schue
knischteret s chiis

wüsse ja beid nid wo si eigentlech häre wei
doch jede schritt macht der nächscht e chli liechter
über ihm rage di tanne i mond
hinger ihre di stadt mit de liechter

ändi vom waud
ändi vor stadt
stägeli uf
stägeli ab

irgend es dänkmau
mit ere süüle
ungere stäge und obe di üüle

är chunt vo obe und sie chunt vo unger
langsami schritt u der puls isch uf hundert

uf der plaquette am socku steit himmu und höu
aber das nimmt die ächt nümme wunger

är seit guet morge
sie guete aabe
mitti vor stäge
blibe si sta
hocke si ab

und vor ihne erschiine steisoudate
und verastaute e militärparade
mit hammer und speere mit schiuder und schwärter
und der lütnant ufem ross treit e marmorgranate

ihri stäge ziehts zum ne haubkreisförmige amphitheater
e massive krater
der mondschiin bündlets zum theaterliecht
obe ängle wo spiele i luftige gwänder

wird vom chor begleitet über hundert sänger
und überau hets lüt wo sich i igang dränge

aber die zwöi hie uf der stäge
wippe langsam uf und ab
und berchöme vo däm shit
gar nüt mit

IZ EIFACH NID ABE LUEGE

bi mir im zimmer flügt e mugge desume
duss im garte louft e blutte desume
mit me bieli i der hang
hanim es kafi bracht
är hets trunke u närl witer no chli schiter gmacht

füf vor mitternacht är wott mér öppis zeige
das ding het flügu wone mitufinger zeichne
und isch verbunge mit emne tandem-velo
u somene bügu woner äue am ne tram het gstole
und är seit

*chum stig mit mir id pedau
chum mir flüge richtig au
i wott stärme gseh
u hie hets bruuni wuuche überau*

*üse flug geit hie dürz tau
när bis zum ärmukanau
die mit ihrem blöde hoffe ufnes wunder
chöi mi*



z härzige auta päärl,
wo nach techi schmöckt,
a der self scan kasse
hett ä frag zum ne rabatt.

unger üs im galopp so wi grafe
rite strapaze uf es paar paragraphe
e horde junkies uf de trottinettli
formiere sich gäg sie u chätsche goggifröschli

das git e chrieg gseh mir vor luft us da
är seit nur: lug die chöis o ohni wlan lustig ha
u fragt mi: weisch warum gits so viu alergie?
d lüt mö d wäut nüm verlide
frage

är isch e verwirrte typ das muesi hie mau säge
uf der angere site het är e troum und weis für was läbe
u nach däm sträbi
u bisi so befreit cha tanze wi der schwäbi
wiichi nüm vo sire site hocke ufe hingersitz u de sägi:

chum stig mit mir id pedau
chum mir flüge richtig au
i wott stärme gseh
so wit und höch bis i pantanau

plötzlech ghöre mir e knau
was das heisst weis i genau
iz eifach nid abe luege
das isch z schönste woni je ha gseh!